

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XL Blg. 23
Disyembre 7, 2009
www.philippinerevolution.net

Editoryal

Duguan ang mga kamay ng rehimen

Duguan ang mga kamay di lamang ng mga Ampatuan at mga armadong pwersa nila para sa masaker sa Maguindanao. Pangunahin ang pananagutan ng rehimen ng US-Arroyo at ng kabuuan ng pinaghahari-an nitong bulok na naghaharing malakolonyal at malapyudal na sistema.

Ang masaker sa Maguindanao ay karumal-dumal na krimen ng isang pyudal at militaristang *warlord* na inaruga at pinalaki ng kaalyado nitong naghaharing rehimen bilang kabayaran sa marami nitong utang sa mga Ampatuan. Binigyang-daan ng rehimen ang ibayong pagpapalaki, pag-aarmas at pamamayagpag ng pribadong hukbo ng angkan ito para magamit na instrumento ng karahasan kapwa sa mga kalaban nila sa reaksyunaryong pulitika at sa mga rebolusyunaryong pwersa at mamamayan.

Nagulantang ang publiko sa malagim na kinahantungan ng sistematiko at walang rendang paglalarga ni Gloria Arroyo sa warlordismo ng kanyang mga alyado. Umani ng matindi at malawakang pagkundena mula sa iba't ibang sektor ng mamamayan sa buong bansa at daigdig ang karima-rimarim na masaker. Ang masaker ay isinagawa ng angkan Ampatuan, kanilang pribadong hukbo at mga kasabwat na pwersang militar, paramilitar at pulisya ng guberno noong Nobyembre 23. Ito ay para lamang mapigilan ang pagrehistro ng kandidatura ng isang malakas na karibal mula sa pamilyang Mangudadatu, isa ring angkan *warlord*.

Umaabot na sa 57 ang natagpuang bangkay sa pinangyarihan ng masaker. Kabilang sa mga biktima ang mga myembro ng ang-



Mga tampok sa isyung ito...

Mga *warlord*, inaruga
ng rehimen PAHINA 3

Panibagong pihit sa
laro ni Arroyo PAHINA 6

10 armas, nasamsam
ng BHB PAHINA 10

kang Mangudadatu, 30 mamamahayag, dalawang abugado at ilang sibilyang nadamay lamang. Ginahasa pa ang ilang babaeng biktima at sinalaula rin ang bangkay ng maraming iba pa.

Mismong sa mga oras na naganap ang masaker, ang mga pinuno ng angkang Ampatuan ay nasa Malacañang at kausap ni Arroyo.

Pinatampok ng masaker sa Maguindanao ang kultura ng walang pakundangang karahasan na inilalarga ng rehimen ng Arroyo at ng kabuuan ng neokolonyal at malapyudal na reaksyunaryong pulitika at sistema ng paghahari sa bansa. Kabilang na rito ang bulok, buktot at anti-mamamayang katangian ng mga reaksyunaryo at oportunistang pampulitikang alyansa sa pagitan ng mga pambansang *warlord* na nag-aagawan at naghahari sa reaksyunaryong estado at mga *warlord* na nag-aagawan at naghahari sa lokal na kapangyarihan. Malaon nang bahagi ng bulok na reaksyunaryong pulitika sa bansa ang brutal na paggamit ng mga *warlord* sa mga pwersang militar, paramilitar, pulisya at pribadong *goons* para sa sariling interes at laban sa interes ng mamamayan.

Ang di hamak na mas maraming biktima ng walang pakundangang karahasan ng naghaharing rehimen at estado ay ang mga lumalaban at nagsusulong ng mga pagbabago sa bulok, marahas at anti-mamamayang paghahari at sistema. Malaon nang duguan ang mga kamay ng naghaharing rehimen sa pagpaslang sa mahigit isang libo nang mga aktibista, mamamahayag at iba pang masusugid na tumutunggali sa buktot na paghahari. Sari-sari pang malalalang paglabag sa karapatang-tao, tulad ng pagdukot, iligal na pagkulong, tortyur, pananakot at iba pang pasistang pang-aabuso ang inihahasik ng naghaharing rehimen sa mga lumalaban dito at maging sa mga inosenteng sibilyan. Milyun-milyon ang biktima ng mga operasyong militar, pwersahang pagpapalikas, blokeyo sa pagkain, pagwasak ng mga komunidad at sakahan at iba pang pasistang karahasan.

Maging sa panahon ng mga eleksyon para sa reaksyunaryong gubyrerno, pinakamarami sa mga pinapatay at dumaranas ng karahasan ng mga pasistang militar, paramilitar, pulisya at pribadong *goons* ng mga *warlord* ay mga militanteng

lider at aktibista ng mga demokratiko at progresibong organisasyong masa at partido. Ang maruruming taktika at karahasan ng mga pwersa ng reaksyunaryong estado laban sa kanila ay ikinukumpas mula sa pinakamataas na antas. Pinakamatingkad na halimbawa ang Inter-Agency Legal Action Group ng Malacañang na siyang nagtakda ng balangkas ng pandarahas at pang-gigipit na ipinatutupad hanggang sa antas ng mga lokal na tirano sa katauhan ng mga *warlord* at kasabwat nilang mga pwersang militar, paramilitar at pulisya.

Dapat mapagpasyang panagutin ang mga pinuno ng mga Ampatuan at lahat ng mga nag-utos at nagpatupad sa masaker sa Maguindanao. Higit pa, dapat panagutin si Gloria Arroyo at ang kanyang rehimen sa karumal-dumal na krimeng ito at marami pang kasalanan sa bayan. Lalo ito't gumagawa ngayon ang rehimen ng iba't ibang desperadong paraan katulad ng pagdedeklara ng batas militar ngayon sa kalakhan ng Maguindanao para idistansya ang sarili sa mga Ampatuan sa harap ng matindi at malawak na kundenasyon sa karumal-dumal na masaker at samantalahin ang iba't ibang paraan at instrumento ng reaksyunaryong estado upang malinlang at lalo pang masupil ang mamamayan, iligtas ang sarili at makapangunyapit pa rin sa poder.

Subalit kahit ano pa ang gawin ni Arroyo at ng kanyang rehimen para iligtas ang sarili, hindi niya matakpan ang nagdudumilat na katoohanang siya ang nasa likod ng mga Ampatuan at may pangunahing responsibilidad sa krimen nila. Siya ang pinakapasimuno sa paghahasik ng kultura ng walang pakundangang karahasan ng gayong mga *warlord*, ng mga pasistang pwersang militar, paramilitar at pulisya, at kabuuan ng pambansa at lokal na makinarya ng teroriso-



Taon XL Blg. 23 Disyembre 7, 2009

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Duguan ang mga kamay ng rehimen	1
Mga <i>warlord</i> , inaruga ng rehimen	3
Masaker, malawakang kinukundena	5
Panibagong pihit sa laro ni Arroyo	6
Pagkandidato ni Arroyo	7

Koresponsal

Mga aral sa kanlurang Cagayan	8
-------------------------------	---

Matatagumpay na TO

10 armas, nasamsam ng BHB	10
Ika-45 taon ng KM, ginunita	10

Pananalanta ng pasistang estado

2 abugado, biktima ng masaker	11
-------------------------------	----

Balita	12
--------	----

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

mo ng papet na reaksyunaryong estado. Di maipagkakaila na siya at ang mga tuso at pasistang pinuno ng kanyang rehimen ang nag-uutos sa paghahasik ng marurumi at mararahas na atake sa mga rebolusyonaryong pwersa, mga aktibista at iba pang masugid na nakikibaka sa bulok at buktot na paghahari ng kanyang rehimen at ng buong sistema. Di maikukubli na ang lahat ng ito ay pinag-iibayo ngayon sa desperasyon niyang makatagal sa pwesto at maiwasang mapanagot sa marami na niyang krimen sa bayan.

Nagsisilbi itong hamon sa mga rebolusyonaryong pwersa at malawak na mamamayan na taglayin ang ibayong determinasyon para iwaksi at palitan di lamang ang umiiral na paghahari at mga buktot at berdugong mga kaalyado at galamay nito, kundi ang kabuuan ng papet at reaksyunaryong estado at ang sistemang tinutuntungan ng bulok, marahas at anti-mamayang rehimen.

AB

Mga warlord, inaruga ng rehimen

Matagal nang kilala ang angkang Ampatuan sa pagiging mababagisik na *warlord*. Subalit pinasahol pa ito ng naghaharing rehimen ng Arroyo.

Bago maganap ang madugong masaker sa Maguindanao, mahigpit na nakapailalim sa kapangyarihang pyudal-militar ng *warlord* na angkang Ampatuan ang prubinsyang ito at ang Autonomous Region in Muslim Mindanao (ARMM).

Mula pa noong dekada 1930, sa panahon ng tuwirang kolonyalismo ng US ay naghahari na sa mga bahaging iyon ng Mindanao ang angkang. Mahigpit silang nakikipagtutungan sa mga pwersang militar, paramilitar at pulisya ng sunud-sunod na papet na reaksyunaryong rehimen. Pinakabase ng pampulitikang kapangyarihan nila ang sangkatlo ng mga munisipalidad sa prubinsya ng Maguindanao.

Ang kasalukuyang pinuno ng angkang, si Andal Ampatuan Sr. ay isa sa mga lokal na *warlord* na ginamit ng diktadurang Marcos sa kampanya laban sa Moro National Liberation Front. Pag-upo sa poder ng rehimen ng Aquino, si Ampatuan Sr., na bise alkalde noon ng Maganoy (ngayo'y Shariff Aguak, kabisera ng Maguindanao) ay hinirang na OIC (*officer-in-charge*) bilang alkalde. Noong 1988 ay upisyal na nahalal siyang meyor.

Noong 2001, nang maghanap ang kaluluklok na rehimen ng Arroyo ng maaaring isabak para maging gobernador ng Maguindanao laban sa nakaupong maka-MILF na gubernador na Zacaria Candao, si Ampatuan Sr. ang pinili. Sa tulong ng AFP, minaniobra ng Malacañang ang pagkapanalo ni Ampatuan. Na sa ikatlong termino na ngayon si Ampatuan Sr. bilang gobernador ng Maguindanao.

Lumaki pang lalo ang kapangyarihan ng mga Ampatuan matapos ang eleksiyong pampanguluhan ng 2004, kung saan nagsabwatan sina Comelec Commissioner Virgilio Garcillano (na nakilala sa mga teyp na "Hello, Garci") at mga Ampatuan para ibigay ang halos lahat ng boto ng prubinsya kay Arroyo. Ang pekeng pangulo ay nagkamit ng may 200,000 boto sa Maguindanao samantalang ang popular na si Fernando Poe Jr. ay nakakuha lamang ng wala pang 60,000 boto. Sa tatlong bayan ng prubinsya, nagawa pa ng mga Ampatuan na palabasing wala ni isang botong nakukuha si Poe. Pagkatapos nito, naghanda ng piging si Arroyo sa Malaca-

ñang para lamang sa mga Ampatuan. Noon namang Setyembre 2005, bilang dagdag na gantimpala sa pagtulong ng mga Ampatuan na magkaroon ng isang milyong "lamang" kay Poe si Arroyo, niluto ng Malacañang ang paghawak ng mga Ampatuan sa Autonomous Region of Muslim Mindanao (ARMM) sa pamamagitan ng panganay na anak ni Ampatuan Sr. na ni Zaldy Ampatuan.



Sa eleksyon noong 2007, higit pang pinatunayan ng angkan ito ang kanilang kapangyarihan nang "maipanalo" nang 12-0 sa Maguindanao at marami pang lugar sa ARMM ang mga kandidato sa pagkase-nador sa ilalim ng "Team Unity" ni Arroyo laban sa oposisyon.

Kapalit nito, binigyang-daan ng rehimen ang pagluluklok sa mga myembro ng angkan Ampatuan sa mga namumunong pwesto sa mga pamahalaang lokal, sa ARMM, sa Kongreso at maging sa gabinete ni Arroyo. Biniyayaan din sila ng rehimen ng Arroyo ng malalaking subsidyo at suportang pinansyal, kabilang ang daan-daang milyong pondo para sa "malalaking proyektong konstruksyon" tulad ng kapitolyo at *sports center*. Higit sa lahat, tinustusan ng estado ang malaking pribadong hukbo at arsenal ng mga Ampatuan.

Bantog sa kasamaan ang pyudal at militaristang angkan at si Ampatuan Sr. mismo sa paggamit ng pwersa at dahas sa kanilang mga kalaban. Noong 1988, pinapatay niya ang pinakamahigpit niyang kalaban sa pagkameyor ng Maganoy bago pa mag-eleksyon. Noon namang 2002, isang taon matapos ang eleksyon, dalawang kamag-anak ni Candao ang ipinadukot ni Ampatuan Sr. at hindi pa natatagpuan hanggang ngayon.

Ang kanilang pribadong hukbo na dati'y mahigpit lamang na nakikipagsabwatan sa mga pwersang militar at pulisya ng reaksyunaryong estado ay ibayong pinalaki at inarmasan ng rehimen ng Arroyo nang ikampanya nito ang maramihang pagtatayo at pag-aarmas ng mga pwersang paramilitar at pagpapailalim ng mga ito sa kapangyarihan ng mga lokal na upisyal. Para rito, inilabas ni Arroyo noong Oktubre 2006 ang Executive Order (EO) 546 na nagbibigay-daan at nagpondo sa mga lokal na upisyal at pulisya na magtayo at mag-ar-

mas ng mga pwersa ng Special Civilian Armed Auxiliary (SCAA) bilang dagdag na pwersa laban sa mga kaaway ng estado. Sa pamamagitan nito ay binigyan ng rehimen ang mga *warlord* na kakampi nito ng lisensya para makapangibabaw sa mga kalaban sa pulitika at gumawa ng mga kabuktutan laban sa mamamayan.

Pero ang pangunahing layunin nito'y magamit ang mga pwersang paramilitar ng mga *warlord* tulad ng mga Ampatuan para labanan ang rebolusyonaryong kilusan ng Moro Islamic Liberation Front (MILF) at Bagong Hukbong Bayan (BHB) at gamiting dagdag na instrumento ng Oplan Bantay Laya. Alinsunod ito sa kabuuang disensyo at mga iskema ng US na gamitin ang terorismo ng estado at walang pakundangang mga paglabag sa karapatang-tao sa iba't ibang antas laban sa rebolusyonaryong kilusan at iba pang oposisyon. Instrumento rito ang sariling mga operatiba ng US, mga pwersa ng papet ng estado at mga lokal na tirano tulad ng mga Ampatuan.

Makaraan ang tatlong taon, ibayong napalaki ng mga Ampatuan ang sariling hukbo tungong 500 hanggang 800 katao, kabilang na ang 200 pwersa ng SCAA, sa basbas ng rehimen ng Arroyo at gamit ang pondo ng gubyrno. Bukod ito sa paggamit at pakikipagsabwatan pa rin nila sa mga lokal na pwersang militar at pulisya.

Di nakuntento sa mga lumang ripleng M14, karbin at Garand na dala ng mga SCAA, bumili pa at nakakuha ang mga Ampatuan ng mas moderno at mas malalakas na armas mula sa militar at pulisya. Kabilang sa mga natagpuan nito lamang Disyembre 4 sa mga taguan nila sa loob at paligid ng naglalarangan nilang mansyon, bodega, rantso at iba pang sikretong taguan ang mga armas tulad ng mga 60 mm mortar, *recoilless rifle*, M60, Ul-

timax, Heckler & Koch *light support machine gun*, kalibre .50 Barrett *sniper rifle*, Belgian FAL at mahigit 200 iba pang malalakas na baril. May mahigit 500,000 bala rin ang natagpuan. Labis-labis ang mga ito para armasang dalawang batalyon. Karamihan sa mga ito'y isinuplay ng reaksyunaryong militar at may mga tatak pang "DND Arsenal."

May mga nakatago pa silang mga *armored personnel carrier* na gamit lamang ng mga militar at pulisya ng gubyrno.

Di lamang nakikita ang mga gamit at gawing ito sa mga Ampatuan. Maging ang mga Mangudadatu na binira ng mga Ampatuan ay armadong *warlord* na angkan din. Sila naman ngayon ang inihalili bilang mga lokal na pasistang galamay ng rehimen ng Arroyo sa Maguindanao at mga karatig nito. Ito'y sa kalagayang sirang-sira na sa publiko ang mga Ampatuan dahil sa dami na ng malilinaw na ebidensya laban sa kanila at sa kahirapan na ng rehimen ng isalba sila at ang buktot na relasyon nila ng rehimen.

Kabilang sa iba pang pyudal at militaristang mga *warlord* na kasalukuyang kakampi ng rehimen ng Arroyo ang anti-Bangsamoro at kontra-rebolusyonaryong *warlord* na angkan Piñol ng North Cotabato na inengganyo ng rehimen ng Arroyo na ibayong magpalakas at magpakawala ng pribadong hukbo nila laban sa MILF, Bagong Hukbong Bayan at iba pang "kaaway ng estado." Nariyan din ang mga Pineda sa Pampanga at mga Dy sa Isabela.

Bagamat tampok ang pagkalat ng mahigit 114,000 armas na hawak ng mga pyudal at militaristang *warlord* sa ARMM, marami ring mababagsik na *warlord* sa iba pang bahagi ng bansa, kapwa mga nasa kampong Arroyo at iba't ibang kampo ng mga reaksyunaryong pulitiko. AB

Masaker, malawakang kinukundena

Malawakan ang panawagan sa buong bansa at daigdig para kundena hin ang masaker sa Maguindanao at panagutin ang mga responsable rito.

Mga pagkundena sa loob ng bansa. Kung hindi agad na mabibigyang-katarungan ng gubyr-nong Arroyo ang mga biktima ng Ampatuan masaker, magbitiw na lang siya sa pwesto.

Ito ang panawagan ng siyam na grupo ng mga peryodista sa pahayag na inilabas nila nitong Nobyembre 30. Isinisisi nila sa rehimen ang kultura ng walang pakundan-gang karahasan na humantong sa karumal-dumal na masaker kung saan 30 mamamahayag ang kabilang sa mga biktima.

Kabilang sa mga iginigiit ng mga mamamahayag ang pag-aresto at pag-uusig sa lahat ng sangkot sa krimen at ang pagbubuo ng ispe-syal na hukuman para rito. Hiniling din nila ang lubos na proteksyon sa mga testigo at ang paglalansag sa lahat ng mga pribadong hukbo sa bansa.

Ang panawagan ay ginawa ng National Union of Journalists of the Philippines, Freedom Fund for Filipino Journalists, College Editors Guild of the Philippines, Center for Community Journalism and Development, Center for Media Freedom and Responsibility, Philippine Human Rights Reporting Project, *Philippine Press Institute*, *Philippine Daily Inquirer* at *Business World*.

Noon ding araw na iyon, 3,000 mamamahayag at mga tagasuporta nila, kasama ang 2,000 myembro ng mga progresibong organisasyon ang nagmartsa patungong Mendiola para kundena hin ang Maguindanao Massacre at igiit ang katarungan para sa mga biktima. Nagdala ang mga aktibistang pinamunuan ng BAYAN, GABRIELA, Promotion of Church People's Response, Solidarity Philippines, People's Movement

for Change at National Union of People's Lawyers ng tatlong itim na kabaong—ang isa'y may nakasulat na "Katarungan," ang ikalawa'y "Kalayaan sa Pamamahayag" at ang ikatlo'y "Karapatang-tao." Ito na ang isa sa pinakamalalaking kilos-protesta ng mga mamamahayag sa Pilipinas.

Sa gitna ng protesta ay tumayo si Press Secretary Cerge Remonde sa may rebulto ng yumaong peryodista at tagapaglathala ng *Manila Times* na si Joaquin "Chino" Roces sa Mendiola at tinangkang basahin ang pahayag ni Gloria Arroyo hinggil sa masaker. Pero sinugod siya ng galit na mga mamamahayag at pinagbabato ng nilukot na mga papel at mga tansan. Napilitan siyang umatras.

Bago umalis ang mga demonstrador, binalot nila ng itim na tela ang rebulto ni Roces. Dito'y nagdikit sila ng mga papel kung saan nakasulat ang mga pangalan ng mga mamamahayag na pinaslang sa Maguindanao. Nagtirik din sila sa panaan ng rebulto ng mga kandilang may nakataling itim na laso.

Dumalo rin sa protesta si Anbalagan Veerasamy, pangkalahatang kalihim ng Confederation of Asean Journalists.

Noong Nobyembre 27, naglunsad din ng martsa ang mahigit 100 mamamahayag sa Cebu na nakasulat ng itim na mga damit at *armband* para iprotesta ang pagkamatay ng mga kasamahan nila at iba pang biktima ng masaker sa Maguindanao. Kinundena rin ng Cebu Media Legal Aid (Cemla) ang masaker ng mga abugadong tagapagtanggol ng karapatang-tao, mga mamamahayag at iba pang biktima ng masaker.

Sa Legazpi City noong Nobyembre 26, mahigit 300 estudyante ng *journalism* ang nagsuot din ng itim na damit at *armband* at sumanib sa mga taong nagtipon sa Bicol University College of Arts and Letters para magsindi ng kandila bilang protesta sa masaker.

Marami rin ang mga nagpahayag ng mga kundenasyon sa iba't ibang lugar at daluyan sa internet.

Mga pagkundena sa ibayong dagat. Sa pagkasawi ng 30 mamamahayag sa masaker sa Maguindanao, ang Pilipinas na ang pinakamapanganib na lugar sa mundo para sa mga kagawad ng midya. Ito ang sinabi ng International Federation of Journalists (IFJ) at Committee to Protect Journalists, mga internasyunal na organisasyong nagtataguyod ng kalayaan sa pamamahayag.

Ito na ang pinakamalaking bilang ng mga mamamahayag na namatay sa isang insidente sa buong kasaysayan ng pamamahayag sa mundo. Bago ito, ang pinakamalaking bilang ng mga mamamahayag na namatay sa isang insidente ay ang 11 empleyado ng Al-Shaabiya, isang istasyon ng telebisyon sa Iraq na sinalakay ng mga armado at nakamaskarang lalaki noong 2006.

Tinukoy ng IFJ na sa 74 na kaso ng pamamaslang sa mga peryodista sa walong taong panunungkulan ng rehimeng Arroyo, apat pa lamang ang nalulutas sa korte.

Ang Reporters Without Borders, isang internasyunal na organisasyong nakikibaka para sa kalayaan sa pamamahayag, ay nagpahayag ng "pinakamariing pagkundena" sa walang katulad na pamamaslang sa Maguindanao, na tinawag nilang "pinakamalalang paglipol ng buhay sa isang araw sa buong kasaysayan ng pamamahayag."

Sinabi rin ng Southeast Asian

Press Alliance na bago pa man ang nangyaring karumal-dumal na masaker sa Pilipinas, isa na ito sa mga nangunguna sa usapin ng pamamaslang ng mga mamamahayag.

Noong Disyembre 1, mahigit 2,000 delegado mula sa 87 bansa na dumalo ika-62 kongreso ng World Association of Newspapers and News Publishers (WAN-Ifra) ang tumayo at nag-alay ng ilang sandali ng kahirap-hirap para kundenahin ang masaker at magpahayag ng simpatya sa pinaslang na mga kasamahan nila sa sektor. Sa isang resolusyon, sinabi ng lupong ng

mga direktor ng WAN-Ifra na ang nangyaring masaker sa Maguindanao ang “pinakamatinding pamatay na atake sa midya sa kasaysayan.”

May mga organisasyon din ng mamamahayag na Pilipino sa ibayong dagat, kabilang na ang Filipino Press Club-United Arab Emirates na kumundena sa masaker at nagsuot din ng mga itim na damit at *armband* bilang protesta.

Kinundena rin ng United Nations, European Commission at iba pang pangdaigdigang organisasyon ang masaker. AB

Batas militar sa Maguindanao

Panibagong pihit sa laro ni Arroyo

Ang Proclamation 1959 ni Gloria Arroyo, na nagpapataw ng batas militar sa kalakhan ng Maguindanao, ay isa lamang bagong pihit sa nagpapatuloy niyang mga pakana.

Noong umpisa, ang agad na naging tugon ng Malacañang sa masaker sa Maguindanao ay protektahan at iligtas ang alyadong pinagkakautangan ng malaki ng rehimeng Arroyo. Subalit ang dami na ng ebidensya laban sa mga Ampatuan at ang dami na rin ng hayagang pagkundena sa masaker mula sa loob at labas ng bansa ay hindi na pwedeng ipagwalambahala ng rehimen.

Wala nang magawa ngayon ang Malacañang kundi iligtas ang sarili. Sinasamantala nito ngayon ang matinding galit at protesta ng mamamayan at mga panawagan na dapat panagutan ng mga salarin ang malagim na masaker, upang magpakana pa ng marurumi, tuso at mararahas na iskema para tiyaking makapangunyapit pa rin sa poder kahit matingkad sa publiko ang pananagutan ng rehimen sa masaker.

Nagbabanggaan ang mismong mga sinasabi ni Arroyo para bigyang-katwiran ang pagdedeklara ng batas militar. Sinasabi niyang rebelyon na ang presensya ng “mga armadong grupo sa prubinsya ng Maguindanao na nasa pusisyon para lumaban sa mga tropa ng gub-

verno.” Pero ang tinutukoy niya ay ang mga lugar na kontrolado ng mga tradisyunal na pulitikong pyudal na *warlord* na sa aktwal ay inaruga at inarmasan ng guberno, at kung saan walang masasabing rebelyon.

Para palabasing may rebelyon sa Maguindanao, naghabi pa ang rehimen ng balitang mayroon umang 4,000 armadong pwersang nakatipon na at nagbabantang umatake sa guberno. Ito’y kahit nabuwag na ang pribadong hukbo ng mga Ampatuan at nakumpiska na ang kanilang mga armas.

Sa kabilang banda, ipinwera ni Arroyo ang mga eryang hawak ng Moro Islamic Liberation Front kung saan naroon ang tunay na rebelyon.

Ang deklarasyon ng batas militar sa Maguindanao ay umaani ng matitindi at malawak na batikos at protesta mula sa mga demokratikong organisasyon, mga tagapagtanggol ng karapatang-tao, mga organisasyon ng mga abugado, mga pwersang oposisyon at iba pang sektor ng mamamayan, at maging mula sa Commission on Human Rights at nakararami sa mga senador. Nagsampa na rin ang ilan

sa kanila ng kaso sa Korte Suprema na kumukwestyon sa batayang ginamit ni Arroyo sa pagpapataw ng batas militar. Anila, bukod sa hindi totoong lumalaban sa guberno ang mga pribadong hukbo sa prubinsya, aktwal na rebelyon o pagatake sa bansa lamang ang pinahihintulutan na batayan ng konstitusyon ng 1987 para sa deklarasyon ng batas militar.

Bukod sa pangangailangang may maipalabas na tugon ang rehimen sa malawak na kahilingang panagutin ang mga Ampatuan, nagdeklara si Arroyo ng batas militar sa Maguindanao para mas madali niyang matiyak na makukuha pa rin ng mga kandidato ng administrasyon ang buong-buong boto ng prubinsya at rehiyon, gamit ang mga pwersang militar ng rehimen.

Ginawa rin ito para pigilin ang mga Ampatuan sa banta nilang ibubunyag ang kanilang nalalaman sa pandaraya ni Arroyo sa mga nagdaang eleksyon, bukod sa iba pang paraan ng pagganti, kung ididiin sila ng rehimen.

Panubok din ito sa planong ipataw din o palawakin ang saklaw ng batas militar sa iba pang lugar o sa buong bansa. Gagamitin ito sa pakanang “no election” at pagpapairal ng “transition rule” para patuloy na makapaghari si Arroyo. AB

Pagkandidato ni Arroyo, bahagi ng pakanang mangunyapit sa poder

Kinumpirma ni Gloria Arroyo ang balak niyang mangunyapit sa poder. Sa dedlayn para sa pagsusumite ng *certificate of candidacy* sa Commission on Elections (COMELEC), pormal na ipinahayag ni Arroyo ang kanyang balak na maging kinatawan ng ikalawang distrito ng Pampanga. Samantalang panay ang iwas dati ng Malacañang na pag-usapan ito, matagal na itong ikinakasa ng pamilyang Arroyo at mga kasapakat nila.

Kabilang sa mga paghahanda nila ang umabot sa 50 beses na pagbisita ni Arroyo at pagbubuhos ng pondo at mga benepisyo roon, na walang ibang kahulugan kundi maagang pangangampanya. Para makatulong sa pagtiyak ng panalo ni Arroyo sa kanyang distrito, nakikipagkutsaba ang kanyang pamilya sa angkan ng kilalang *jue-teng lord* na si Rodolfo "Bong" Pineda para agawin ang pamumuno ng buong prubinsya mula sa popular na gobernador ng Pampanga na si Fr. Ed Panlilio.

Di nasasapol ng ilang kritiko ang susing punto sa pagtakbo ni Arroyo sa pagkakongresista. Napakasimple ng kanilang interpretasyon na plano lamang ni Arroyo na maging ligtas mula sa asunto matapos ang kanyang termino bilang presidente. Inaasahan niyang sasampahan siya ng mga kaso kaugnay ng kanyang pagtataksil sa bayan, pandarambong at paglabag sa karapatang-*tao* na nagpatung-patong sa loob ng halos isang dekada niyang paghahari.

Ang tunay na pangmatagalang plano ni Arroyo ay sunggaban ang pwesto sa Mababang Kapulungan ng kanyang pinagmulang distrito

bilang unang hakbang. Nais niyang sagarin ang kanyang kapangyarihan bilang presidente hanggang sa huling araw ng upisyal niyang termino para tiyaking mahahawakan pa rin ng kanyang mga kampon ang mayorya sa Mababang Kapulungan upang mailuklok siya bilang House Speaker. Balak niyang gawing transisyunal lamang ang susunod na presidente. Ang mga planong ito ang tuntungan niya para sa pakanang cha-cha na magluluklok sa kanya bilang punong ministro sa ilalim ng sistemang parlamentaryo.


Ito ang "Plan A" ni Arroyo. Kahawig ito ng ginawa ni dating presidente Vladimir Putin ng Russia nang hindi na siya maaaring tumakbo para sa panibagong termino bilang presidente. Tumakbo si Putin sa parlamento at nagpwesto ng piniling kahalili, si Dmitri Medvedev, bilang presidente. Sa katunayan, si Medvedev ay tau-tauhan lamang ng dating presidente na patuloy na naghahari sa gubyrno sa Russia bilang punong ministro.


Pero sakaling maging mahirap ang lahat ng ito para sa kanya at kanyang makinarya, may "Plan B" rin si Arroyo para palawigin ang

kanyang paghahari bilang "presidenteng pantransisyon" sa pamamagitan ng *emergency powers*. Ito mismo ang dahilan kaya hinirang bilang Defense Secretary ang pusakal na kleriko-pasistang si Norberto Gonzales, isang promotor ng kultura ng walang pakundangang kahasan at walang kahihyang tagapagtaguyod ng pananatili ni Arroyo sa poder sa isang "rehimeng pantransisyon."

Lumalakas din ang mga pangamba ngayon na magpapakana ang kampong Arroyo ng kumbinasyon ng dalawang senaryo. Maaaring ang idedeklara lamang na panalo sa eleksyon ay yaong mga tumakbo sa Mababang Kapulungan at mga lokal na pwesto, samantalang palalabasing bigo ang eleksyon para sa mga pambansang pusisyon kabilang na ang sa presidente, bise presidente at mga senador. Ang magiging Speaker sa gayon ang siyang tatayong "presidenteng pantransisyon" habang ikinakasa pa ang cha-cha.

Lahat ng ito ay nangangahulugan na ang laban para patalsikin si Arroyo at ang kanyang rehimen ay hindi pa matatapos sa pagwawakas ng kanyang kasalukuyang termino sa Hunyo 2010. Umubra man ang pakana niyang tumakbo sa Kongreso at maging punong ministro, o bumaling sila sa pagpapakana ng *failure of elections* bilang sangkalan para palawigin ang paghahari ni Arroyo sa ilalim ng *emergency transition rule*, kakailanganing ipagpatuloy ng sambayanang Pilipino ang paglaban nila sa naghaharing rehimen bulok, malupit at hayok sa kapangyarihan hanggang tuluyan itong mapatalsik at mapanagot sa lahat ng karumal-dumal nitong krimen sa mamamayan. **AB**





Mga aral sa antipasistang kampanya sa West Cagayan

Taong 2006 nang ilunsad ng 5th ID ng Philippine Army sa Cagayan Valley ang Task Force Amiya, isang kontra-rebolusyonaryong kampanyang binalangkas sa Oplan Bantay Laya 2 (OBL2) ng rehimeng Arroyo. Nilayon nito na durugin ang mga yunit ng Bagong Hukbong Bayan (BHB) at paatrasin ang rebolusyonaryong kilusan sa silangan at kanlurang Cagayan.

Sa kanlurang Cagayan ikinonsentra ang tig-dalawang kumpanya ng 21st IB, 17th IB at 53rd Reconnaissance Company. Dinagdagan pa ito ng Separate Rifle Company, 77th Civilian Armed Auxiliary at Regional Mobile Group ng Philippine National Police (RMG-PNP). Naglunsad ang mga pwersang ito ng malalaki at tuluy-tuloy na operasyong kombatan kaakibat ng paghahasik ng karahasang militar gaya ng pagpaslang sa mga lider-masa, sapilitang pagpapasurender, pagdukot, panonortyur at pananakot.

Makaraan ang ilang taong pananalasa ng OBL2, hindi lamang naigpawan ng rebolusyonaryong ki-

lusan at ng mamamayan ang pasisistang kampanya, naipagtanggol nila ang mga tagumpay sa iba't ibang larangan ng pakikibaka at napreserba ang kanilang pwersa. Napanghawakan ng panteritoryong komite ng Partido ang mahabang kasaysayan at karanasan ng paglaban ng mamamayan para isulong ang pampulitika at pangmilitar na kampanya rito.

Kahalagahan ng pagkakaisa at kapasyahan ng Partido. Ang halaga ng mahigpit na pagkakaisa mula sa antas-larangan hanggang sa mga sangay ng Partido sa lokalidad ang isa sa pinakamahahalagang leksiyong nakalap ng West Cagayan

sa pagharap sa mabangis at mapanlinlang na kaaway.

Napakahalagang maitaas ang mapanlabang diwa ng hukbo at ng mamamayan. Upang makamit ito, higit pang pinataas ang pang-ideolohiyang kaalaman ng hukbo at masa na siyang nagbigay ng kumpanyansa at tatag sa paninindigan ng buong rebolusyonaryong pwersa sa erya. Ito ang nagpatibay sa pagkakaisa ng kolektibo ng Partido mula sa pagpapalano hanggang sa pangunguna sa implementasyon ng trabaho.

Tiniyak ang pagkakaroon ng mga plano, pagtatasa at pagkakaroon ng angkop na punahan hanggang sa antas ng sangay ng Partido sa lokalidad. Pinatingkad ang mga nakamit na positibong resulta ng pagkakaisa at pagtutulungan ng kolektibo. Tinalakay at nilutas din ang mga suliraning kinakaharap ng mga kasapi at kolektibo; nilinaw ang tungkulin ng sangay sa pagpapasampa at plano sa kampanyang antipasista sa West Cagayan. Sa loob ng mga organisasyong masa, bilang paghahanda sa laban, pinag-aralan ang mahahalagang dokumento tungkol sa mga operasyong militar ng Armed Forces of the Philippines (AFP).

Ang nakamit na mga tagumpay ang naging tuntungan para mahimok ang pinakamalalawak na hanay ng mamamayan na lumahok sa kampanyang antipasista. Kumilos sila para kunin ang suporta ng mga lokal na upisyal sa kanilang mga lugar, mga panggitnang pwersa, ng masmidya at iba pang personahe na tumulong sa pagsasampa ng mga kaso laban sa militar. Naitalak ang Commission on Human Rights (CHR) at pati na ang PNP na mag-imbetiga at ihayag na mga militar ang may kagagawan sa pagpatay at pagdukot.

Tuluy-tuloy na naibunyag ang



mga abuso at panggigipit ng militar sa lugar. Ginamit ng mamamayan ang iba't ibang paraan gaya ng tuluy-tuloy na pagbubulgar sa radyo sa mga tampok na pang-aabuso ng militar sa mga baryo. Kabilang dito ang sapilitang pagrerekrut sa CAFGU sa mga upisyal ng barangay, paghahalughog ng kabahayan ng mga magsasakang Agay, pagnanakaw, pangigikil at iba pa. Tuluy-tuloy ang mamamayan sa pagpapadala ng mga mensaheng *text* at nakasulat na mga pahayag sa radyo at mga pahayagan at nagparami ng mga polyeto gamit ang mga karton ng kaha ng sigarilyo at likuran ng mga lumang kalendaryo. Pinagsali-ta nila ang mga biktima ng karahasan sa mga istasyon ng radyo.

Nagkakaisang kumikilos ang mga magsasaka kahit pa sa panahong may dinudukot o pinapaslang ang kaaway mula sa kanilang hanay. Halimbawa nito, isandaang matatandang magsasaka, kababaihan, kabataan at mga bata ang umikot sa mga kampo ng 17th IB at sa istasyon ng Bombo Radyo para igiit ang pagpapalaya sa isang lider-masa na hinuli ng kaaway. Muli nila itong ginawa nang dukutin ang lima pa sa hanay nila. Dalawa sa mga dinukot ay pinatay ng militar.

Mahusay din ang naging suportahan ng mga baryong magkakanugnog na inaatake ng kaaway. Halimbawa, kung ang isang baryo ay dinudumog ng kaaway at maluwag ang isa, ito ang nagmomobilisa ng mga tao. Nagkaisa silang magtutulongan sakaling salakayin din ng militar ang karatig na mga bayan.

Wastong manera ng platun. Isa rin sa mahahalagang aral ng Partido ang pagtiyak sa wastong manera ng pagkilos ng platun para magampanan ng BHB ang gawaing masa't gawaing militar sa gitna ng mga atake ng kaaway.

Pinag-aralan ng BHB ang sitwasyong militar sa tipak at mula rito ay naitakda ang maingat at lihim na pagkilos ng platun. Nagmobilisa rin ang mga Pulang mandirigma ng mga iskwad ng milisyang bayan. Nagtasa at nag-aral ang milisyang bayan kasabay ng pagbabalik-aral sa kanilang mga tungkulin at plano. Sumama sila sa paghahanda at mismong paglulunsad ng mga taktikal na opensiba.

Sa mga panahong mahigpit ang sitwasyong militar, napanatili ang mataas na moral ng mga Pulang mandirigma. Para matiyak ang seguridad, 24 na oras silang nagtatatliba. Umangkop sila sa limitadong pang-araw-araw na suplay. Ang milisyang bayan ang siyang nagrekorida sa pusisyon ng kaaway, magagap na nagpaabot ng impormasyon sa kilos nito at nag-ayos ng suplay. Pansamantala rin silang sumanib sa platun ng BHB. Sa ganitong paraan ay natugunan ang mga batayang pangangailangan ng hukbo at nakapagmantine ito sa kabila ng mahirap na kalagayan.

Mahusay na ipinatupad ang konsentrasyon at dispersal ng platun. May humaharap sa masa para sa gawaing konsolidasyon gaya ng pagbibigay ng edukasyon at pag-aayos ng mga organisasyong masa. Ang iba naman ay binubuo bilang mga tim at iskwad upang humarap sa gawaing pinansya at gawaing militar. May panahon ding nagtatataga ng iskwad na aasikaso sa pagpapalawak sa iba pang mga kalapit na baryo.

Hindi binitawan ang gawaing konsolidasyon sa loob ng platun. Sa gitna ng pagharap sa gawaing masa at gawaing militar, nag-aaral sila at nagpaplano. Pinagagana ang mga iskwad upang matiyak ang paggampan ng mga trabaho. Buwanan na nagpaplano at nagtatasa ang mga Grupo ng Partido sa loob

ng mga ito. Sa bawat araw, tinitiyak na may takdang gawain ang bawat Pulang mandirigma upang maging epektibo ang bawat kasama at maging mabunga ang kabuuang trabaho ng platun.

Mga taktikal na opensiba. Sa loob ng apat na buwan (mula Agosto hanggang Disyembre 2008), nagsagawa ang platun ng BHB ng tatlong taktikal na opensiba at aksyong militar. Kalahok dito ang milisyang bayan na inihanda nila kasama ang masa sa lokalidad. Inambus nila ang isang platun ng 17th IB, dinisarmahan ang isang tauhan ng sagadsaring pulitiko at pinarusahan ang isang ahenteng paniktik ng 17th IB.

Sa mga taktikal na opensibang ito, nakasamsam ang BHB ng M16, isang de-sabog, isang pistolang kalibre .45 at tatlo pang pistolang kalibre .38. Naglunsad din ng sariiling mga aksyong militar ang milisyang bayan.

Sa pagkakaisa at pangunguna ng Partido, pagsandig sa masa at wastong pamamaraan ng platun ng BHB, nakamit ang isang antas ng konsolidasyon ng hukbo at mamamayan sa gitna ng pagsalakay ng 501st Bde. Kasama ang BHB, tumapang ang mamamayan sa pagharap sa kaaway at natuto sila mula sa karanasan.

May paghupa na ang mga paglabag sa karapatang-tao, nasampahan ng kaso ang mga upisyal ng AFP tulad ni Lt. Johnny Calub, CO ng Charlie Coy ng 17th IB at Intelligence Officer ng batalyon. Madaalang na ang pagpasok ng militar sa lugar at humupa ang pwersahang pagrerekrut sa CAFGU.

Samantala, patuloy ang militarisasyon sa lugar. Pero tiwala ang buong Partido roon na lubos na magagapi ang OBL2, gaya ng pagkabigo ng mga nakaraang kontrarebolusyonaryong pakana. **AB**



10 armas, nasamsam ng BHB

Sampung armas ang nakumpiska ng mga Pulang mandirigma ng Bagong Hukbong Bayan (BHB) sa mga labanan nitong pangalawang hati ng Nobyembre hanggang unang linggo ng Disyembre. Siyam na sundalo ang napatay at 15 naman ang nasugatan sa panig ng militar. Walang kaswalting natamo ang mga Pulang mandirigma.

Disyembre 3. Tatlong sundalo ng Philippine Army ang napatay at apat ang nasugatan sa pinakahuling ulat ng mga labanan sa pagitan ng Bagong Hukbong Bayan (BHB) at militar sa Compostela Valley.

Nagsimula ang labanan nang tambangan ng mga Pulang mandirigma ng Front 20 ng BHB ang tropa ng 28th IB ng Philippine Army habang nagpapatrulya ito sa Sityo Calaberahan, Diwata Complex, bayan ng Monkayo. Nakasamsam ang BHB ng tatlong M16.

Nobyembre 29. Dalawang M16 naman at isang pistolang kalibre .45 ang nakumpiska ng mga Pulang mandirigma ng BHB sa reyd sa himpilan ng pulisya sa bayan ng Divilacan, Isabela. Bukod dito, nakasamsam din sila ng isang *hand grenade* at isang *rifle grenade*, 44 na magasing puno ng bala, isang *base radio*, isang makinilya at pitong uniporme ng pulis.

Nobyembre 23. Apat na elemento ng 69th IB ang nasugatan nang pasabugan ng *command-detonated explosives* ng mga Pulang mandirigma ng 1st Pulang Bagani Company-BHB habang nagpapatrulya ang mga sundalo sa Barangay Fatima, Paquibato District, Davao City.

Samantala, sa Catanduanes, patuloy na binibigo ng armadong rebolusyonaryong kilusan sa isla ang inilulunsad na kampanyang militar ng kaaway. Ayon sa pinakahuling ulat ng Nerissa San Juan Command (NSJC)-BHB, dalawang sundalo ng 83rd IB ang napatay at pito ang

nasugatan nang tambangan sila ng mga Pulang mandirigma sa Barangay Guiamlong, Caramoran. Pauwina sa kanilang kampo ang mga sundalo ng guberno mula sa matinding operasyong militar nila sa lugar nang sila ay tambangan.

Noon namang Nobyembre 17, kabilang si Lt. Rodel Balatbat, kumander ng Bravo Coy ng 83rd IB, sa apat na sundalong napatay nang tambangan sila ng apat-kataong tim ng NSJC sa Barangay Alinawan, bayan ng Panganiban. Sakay ng dalawang motorsiklo ang mga kaaway nang paulanan sila ng bala.

Sa laking kahihiyan, hindi man lamang ibinalita ng militar sa rad-

yo't pahayagan ang pagkamatay ng upisyal ng 83rd IB.

Nobyembre 16. Sa Samar, isang M16, isang M14, isang Garand at isang karbin ang nasamsam ng mga mandirigma ng Nida Cantong Command sa ambus na inilunsad nila laban sa mga elemento ng 52nd IB sa Barangay Dawo, Oquendo District, Calbayog City, ayon sa pinakahuling mga ulat mula sa larangan.

Napatay sa ambus ang dalawang elemento ng CAGU at malubhang nasugatan ang isang sarhento n 52nd IB.

Taliwas sa pahayag ni Lt. Col. Armando Rico, tagapagsalita ng 8th ID, walang kaswalti sa panig ng mga Pulang mandirigma.

Ang sunud-sunod na mga taktikal na opensiba sa Eastern Visayas, ani Ka Karlos Manuel, panrehiyong tagapagsalita ng BHB, ay nagpapakita na bigo ang Oplan Bantay Laya sa rehiyon. **AB**

Ika-45 taon ng KM, ginunita

Naglunsad ng raling iglap ang mga kasapi ng Kabataang Makabayan (KM) para ipagdiwang ang ika-45 anibersaryo ng organisasyon nitong Nobyembre 30.

Nagmartsa ang mga aktibista mula Morayta St. hanggang Carriedo sa Maynila noong Nobyembre 27. Nanawagan sila ng katarungan para sa mga biktima ng Maguindanao Massacre. Nanawagan din sila sa kabataan na tumungo sa kanayunan at sumapi sa Bagong Hukbong Bayan.

Nagbigay naman ng pahayag si Prof. Jose Ma. Sison, tagapangulong tagapagtatag ng KM. Sinabi niya na malaki ang naging papel ng kabataan sa pagsulong ng pakikibaka ng mamamayan, laluna sa paglaban sa diktadurang US-Marcos. Maraming kadre at aktibista ng KM ang nag-alay ng buhay at humawak ng malalaking responsibilidad sa rebolusyon. Marami ang itinalaga sa kanayunan para gumampan ng gawain sa pulitika, militar, kultura at iba pang larangan.

Samantala, itinanghal sa University of the Philippines ang dulang *Ang Makata'y Mandirigma, Mandirigma'y Makata* noong Nobyembre 30 bilang bahagi pa rin ng pagdiwang. Ang dulang ibinatay sa tulang "The Guerrilla is Like a Poet" ni Sison ay isinulat ni Bienvenido Lumbera at idinirihe ni Romel Linatoc. **AB**

Dalawang abugado, biktima ng masaker sa Maguindanao

Dalawang abugadong tagapagtaguyod ng karapatang-tao ang kabilang sa 57 biktima ng masaker sa Maguindanao noong Nobyembre 23. Sina Atty. Concepcion "Connie" Brizuela, 56, at Atty. Cynthia Oquendo, 35, ay kabilang sa mga minasaker ng *private army* ng mga Amputuan.

Sina Brizuela at Oquendo ay parehong myembro ng Union of People's Lawyers in Mindanao (UPLM). Myembro rin si Brizuela ng Gabriela Network of Professionals sa North Cotabato.

Pinarangalan sina Brizuela at Oquendo sa paggunita sa International Day of Women Human Rights Defenders sa Mendiola Bridge na pinangunahan ng mga kasapi ng Gabriela Women's Party, Karapatan at Tanggol Bai. Mariing tinuligsa ng mga dumalo sa pagtitipon ang karumal-dumal na masaker na isinagawa ng mga kaalyado ni Gloria Arroyo.

Sa ilalim ng rehimeng Arroyo, 50 sa 1,115 biktima ng ekstrahudisyal na pamamaslang ay mga babang tagapagtanggol ng karapatang-tao.

Sumusunod ang iba pang ulat sa paglabag sa karapatang-tao na nakalap ng *Ang Bayan*:

Nobyembre 27. Pinagbabaril

ng tatlong lalaki ang bahay ni Edgar Cadagat, presidente ng Negros Press Club at dating pambansang tagapangulo ng National Union of Journalists of the Philippines (NUJP). Sakay ng *multicab* at motorsiklo ang mga salarin.

Ang atake kay Cadagat ay hindi nakapigil sa martsa ng mga kagawad ng masmidya sa Negros noong Nobyembre 30 na naggugumiit ng hustisya para sa mga biktima ng masaker sa Maguindanao. Dalawa sa mga namatay na mamamahayag—sina Bart Maravilla ng Bombo Radyo-Koronadal at Henry Araneta ng dzRH-Cotabato—ay mga residente ng Negros Occidental. Nagsuot ng mga itim at pulang *T-shirt* ang mga nagmartsa at nagtipon sa tapat ng upisina ng Negros Press Club sa Bacolod City.

Nobyembre 28-29. Dinukot at pinatay ng mga elemento ng 25th IB, 7th Special Forces-AFP at CAFGU si Conrado Cañete, 57 anyos, isang magsasaka at ama ni Ka Jinggoy, isang Pulang kumander. Huling nakitang buhay si Cañete na nakikipista sa Barangay Banlag, Monkayo, Compostela Valley noong Nobyembre 28. Ayon sa mga saksi, nakisali sa grupo ni Cañete na nag-iinuman noon ang mga militar. Hindi nakauwi noong gabing iyon si Cañete sa kanyang bahay sa kalapit na Barangay Gabanan.

Madaling araw kinabukasan, nakitang itina-pon si Cañete mula sa isang kotseng dumaan sa Sityo Highlander, Barangay Gabanan. Mula sa loob ng sasakyan ay pinaulanan ng bala si Cañete. Nagtamo siya ng 12 tama ng bala.

Malaon nang minamanmanan ng militar ang pamilyang Cañete. Siya ang ginantihan ng militar dahil sa sunud-sunod na matatagumpay na taktikal na opensiba ng yunit ng BHB na pinamumunuan ng kanyang anak. Sa isang pahayag, sinabi ni Ka Nadem, tagapagsalita ng 4th Pulang Bagani Company ng Merardo Arce Command ng BHB sa Southern Mindanao na gawi na ng AFP na patayin ang mga kapamilya ng mga kilalang kasama para maghiganti at gipitin ang tinatarget na myembro ng BHB, tulad ng ginawa sa anak ni Ka Parago na si Rebelyn.

Nobyembre 23-24. Namatay si Danilo Benalo, 57 anyos, myembro ng Center for Filipino Seafarers at organisador ng MIGRANTE International dahil sa *stroke* (pagbabara o pagputok ng ugat sa utak) matapos siyang bantaan at tangkaing rekrutin ng mga elemento ng Intelligence Service of the AFP (ISAFP).

Bandang tanghali ng Nobyembre 23 nang lapitan si Benalo ng mga elemento ng ISAFP at magpakita sa kanya ng umano'y maha-bang listahan ng datos ukol sa kanya. Sinabihan nila si Benalo na mahigit isang taon na siyang minamanmanan at wala umano siyang mapagtataguan. Binalaan si Benalo na dudukutin at sasaktan ang kanyang mga anak kung hindi siya makikipagtulungan sa ISAFP. Ipinabubunyag kay Benalo ang pangalan at kinaroroonan ng mga susing lider at organisador ng mga progresibong organisasyon.

Dahil sa takot para sa buhay ng kanyang mga anak, pumayag na makipagkita si Benalo sa mga ele-




Concepcion Brizuela at Cynthia Oquendo

mento ng ISAFP bandang alas-5 ng hapon malapit sa Cultural Center of the Philippines, Pasay City. Sinabihan niya ang kanyang kaibigang abugado na babalitaan ito hinggil sa resulta ng pakikipagkita sa ISAFP subalit hindi na niya ito nagawa. Pagsapit ng alas-7 ng gabi, tinawagan sa *cellphone* si Benalo ng kanyang kaibigan. Isang nagpakilalang Jason ang nagsabing dinala si Benalo sa ospital dahil sa *stroke*. Sinabi ng mga doktor sa pamilya ni Benalo na apat na lalaki ang nagdala sa kanya sa ospital. Namatay si Benalo noong umaga ng Nobyembre 24.

Matapos mamatay si Benalo, patuloy pa ring tinatakot ng ISAFP ang kanyang pamilya. Minonitor ng ISAFP ang kondisyon ni Benalo sa ospital at gayundin ang kanyang burol.

Nobyembre 23. Tatlong kasapi ng Samahang Magbubukid ng Batangas (SAMBAT) ang dinakip ng magkasanib na pwersa ng pulisya at militar sa Talisay, Batangas. Sila ay kinilalang sina Billy Bateria, Sonny Rogelio at Charity Denio. Ang tatlong biktima ay pinaratangang mga myembro ng Bagong Hukbong Bayan (BHB).

Nobyembre 23. Pinagbubugbog at pinaratangang mga myembro ng BHB sina Mateo Molato, 57 anyos, at mga anak niyang sina Jimboy, 21 anyos at Richard, 18 anyos, pawang mga magsasaka. Nagtatrabaho noon sa kanilang sakahan sa Sityo Salagunting, Barangay Fatima, Paquibato District, Davao City ang mga biktima nang basta na lamang silang damputin ng mga elemento ng 69th IB. Ang isa sa mga anak ni Molato ay tinutukan ng baril sa loob ng bunga. Pinagpipilitan ng militar na may kinalaman sila sa pagsabog ng isang eksplosibo malapit sa kanilang sakahan na ikinasugat ng apat na sundalo. 

Pagbisita ni Arroyo sa UP, napigil ng protesta

MATAGUMPAY na napigilan ng kilos-protesta ng mga estudyante, guro at empleyado ng University of the Philippines (UP) sa Diliman, Quezon City ang pagtungo sana roon ni Gloria Arroyo bilang pangunahing panauhin sa pagpapasinaya sa GT-Toyota Asian Cultural Center noong Disyembre 2.

Ipinahayag ng mga demonstrador na hindi katanggap-tanggap ang pagtuntong ni Arroyo sa UP. Binatikos nila ang kabiguan niyang kagayat na resolbahin ang masaker sa Maguindanao noong Nobyembre 23. Kinundena rin nila ang pagtakbo ni Arroyo bilang kongresista ng Pampanga.

Sinabi rin nilang pinalala ni Arroyo ang kalagayan ng edukasyon sa UP sa unti-unting pagbabawas ng badyet ng pamantasan at tumitinding komersyalisasyon ng unibersidad.

Tinangkang buwagin ng PNP Quezon City, UP Diliman Police at UP Special Service Brigade ang kilos-protesta. Siyam na estudyante ang nasugatan nang sila ay sapa-kin at posasan. May mamamahayag ding sinaktan. Sinabi ng mga aktibista na mahigpit na ipinagbabawal ng *charter* ng pamantasan ang pagpasok ng mga pulis sa kampus. Binatikos din nila si UP Diliman Chancellor Sergio Cao na siyang humiling sa pagpasok ng mga pulis sa unibersidad.

Ang piket ay pinangunahan ng Student Alliance for the Advancement of Democratic Rights in UP (STAND-UP), Contend-UP at All-UP Workers Union. Nakiisa rin ang Faculty Regent ng UP System na si Judy Taguiwalo at Student Regent na si Charisse Banez, gayundin ang mga mag-aaral ng Polytechnic University of the Philippines.

Ocampo, Maza, tatakbong independyente

INDEPENDYENTENG kakandidato sa pagkasenador sina Rep. Satur Ocampo ng Bayan Muna at Rep. Liza Maza ng Gabriela Women's Party sa 2010.

Ito na ang kapasyahan ng walong progresibong organisasyong pinagbuklod sa Koalisyon ng Makabayang Mamamayan (Makabayan), ani Ocampo nang maghain sila ni Maza ng *certificate of candidacy* sa Commission on Elections (COMELEC) noong Nobyembre 29.

Naunsiyami ang pakikipag-alyansa sana ng Makabayan sa Nacionalista Party (NP) ni Manuel Villar nang makipag-alyansa ang NP kay Ferdinand "Bongbong" Marcos, Jr. ng partidong Kilusang Bagong Lipunan.

Ayon sa Makabayan, hindi maaring magsama sa isang alyansa sina Ocampo at Marcos. Ito ay dahil sa matatag na paninindigan ng Makabayan na bawiin ang mga nakaw na yaman ng mga Marcos at bigyang-hustisya ang libu-libong biktima ng paglabag sa karapatang-tao noong panahon ng diktadura. Bago naging mga mambabatas sina Ocampo, 70, at Maza, 52, ay kilalang mga anti-Marcos na aktibista sila na nakaranas ng kalupitan ng pasistang diktadura.

Gayunman, bukas sina Ocampo at Maza sa posibilidad na may suportahang kandidato sa pagkapresidente at bise presidente. Bukas din sila na maging *guest candidate* ng mga partidong oposisyon.

Patuloy ang pagdausdos ng ekonomya

BUMAGSAK nang 22.8% ang mga import ng Pilipinas mula noong isang taon, ayon sa pinakahuling ulat ng National Statistics Office. Pangunahing salik dito ang 20.3% pagbagsak ng importasyon ng mga pyesang elektronik na bumubuo ng 33.8% ng mga produktong inangat ng bansa.

Awtomatiko ring bumagsak ang mga eksport dahil ang inaangkat na mga pyesang elektronik ay ginagamit sa malamanupaktura ng mga produktong elektronik na bumubuo ng mahigit 60% ng mga produktong iniluluwas ng bansa. Umabot sa 26% ang paghina sa eksport ng mga produktong elektronik mula noong isang taon. Bunga nito, umabot na lamang sa

\$3.42 bilyon ang halaga ng mga eksport nitong Hunyo kumpara sa \$4.52 bilyon sa parehong buwan noong 2008. Katumbas ito ng 24.7% na pagbagsak.

Samantala, bumagsak nang 12.4% ang bolyum ng produksyon ng mga pabrika nitong Setyembre kumpara sa parehong buwan noong 2008. Labing-isang buwan nang tuluy-tuloy ang pagbagsak ng manupaktura. Pinakamalaki ang pagbagsak sa mga produktong petrolyo, mga produktong yari sa balat, mga inumin, sapatos at kasuotan, papel at produktong yari sa papel, produktong yari sa tabako, tela, mga produktong kemikal, mga produktong yari sa kahoy at makinaryang de kuryente.

Karagdagang tropa sa Afghanistan, tinututulan

TINUTUTULAN ng ilang kaalyado ng US sa North Atlantic Treaty Organization (NATO) ang karagdagang 10,000 tropa na hinihiling ng US na ipadala sa Afghanistan bilang bahagi nila sa karagdagang 40,000 tropa roon. Ito'y dahil umaani na ng mariing pagbatikos sa kani-kanilang mga bansa ang pagsangkot nila sa interbensyunistang gera ng US. Ang pagpapadala ng karagdagang 40,000 sundalo ay bahagi ng kabuuang istrategiya ng US para sugpuin ang pakikibaka ng mamamayan ng Afghanistan. Ang US ang magpupuno ng natitirang 30,000 kinakailangang sundalo.

Isa sa mga bansang tumutol na magpadala ng karagdagang tropa ang France. Sa Britain naman, mahigit 70% ng mamamayan ay pabor sa maagang pag-atras ng kanilang mga tropa. Sa gitna ng mariing pagtutol, 500 lamang ang

ipinangako ng Britain na maipapadala. Sa Germany, ipapailalim pa sa pag-aaprubang ng parlamento ang pagpapadala ng karagdagang tropa. Ang The Netherlands at Canada naman ay may planong tuluyan nang iatras ang kanilang mga tropa. Nagpahayag ang mga upisyal ng depensa sa Canada na wala silang intensyong magpadala ng karagdagang tropa at iaatras na ito sa katapusan ng 2011.

Ang Germany ay may 4,300 tropa sa Afghanistan samantalang ang France ay may 3,750 tropa. Ngayong taon, umabot na sa 98 ang kaswalti ng Britain, pinakamataas mula nang sumabak ito sa gera sa Afghanistan. Ang US ay may 298 na kaswalti at 87 naman ang mula sa iba pang bansa. Mula 2001 ay umabot na sa 1,530 ang kabuuang kaswalti ng mga manalakay na bansa sa pangunguna ng US.

Dubai, tinamaan ng krisis

NAYANIG ang mundo ng internasyunal na pinansya at pagbabangko nang ianunsyo ng gubyrerno ng Dubai noong Nobyembre 25 na humihingi ito ng anim na buwang palugit sa pagbabayad ng mga utang. Tumanggi naman ang Abu Dhabi, na mayaman sa langis, na sagutin ang dambuhalang utang na di na mabayaran ng Dubai. Ang Dubai at Abu Dhabi ay mga estado ng United Arab Emirates.

Tinatayang umaabot sa \$80 bilyon ang kabuuang utang ng Dubai sa iba't ibang bangko. Limampu't siyam na bilyong dolyar (\$59 bilyon) nito ay ginugol sa mahalang mga proyektong *real estate* gaya ng mga hotel, kondominyum at iba pa.

Matinding natamaan ng krisis sa ekonomya at pinansya ang sektor ng *real estate* na hinahawakan ng Nakheel, ang namamahala sa pagpapatayo ng mga mamahaling proyektong *real estate* sa Dubai. Umabot sa \$3.52 bilyon ang utang nitong hindi mababayaran.

Bunga ng anunsyo ng gubyrernong Dubai na hindi ito makapagbabayad ng utang, bumagsak ang halaga ng mga sapi sa dalawang malalaking bangko—ang Hongkong and Shanghai Banking Corporation (HSBC) at Standard Chartered. Ang naturang mga bangko ay may malaking pondo na ipinautang sa Dubai.

Tinatayang aabot sa 250,000 manggagawang Pilipino roon ang mawawalan ng trabaho dahil sa krisis sa pinansya sa Dubai.

May pangamba rin ang mga ekonomista na masusundan pa ang Dubai ng iba pang bansa, lalo pang lalala ang pandaigdigang resesyon at bubulusok pa ang pandaigdigang sistemang kapitalista.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XL Blg. 23
Disyembre 7, 2009
www.philippinerevolution.net

Editoryal

Duguan ang mga kamay ng rehimen

Duguan ang mga kamay di lamang ng mga Ampatuan at mga armadong pwersa nila para sa masaker sa Maguindanao. Pangunahin ang pananagutan ng rehimen ng US-Arroyo at ng kabuuan ng pinaghaharian nitong bulok na naghaharing malakolonyal at malapyudal na sistema.

Ang masaker sa Maguindanao ay karumal-dumal na krimen ng isang pyudal at militaristang *warlord* na inaruga at pinalaki ng kaalyado nitong naghaharing rehimen bilang kabayaran sa marami nitong utang sa mga Ampatuan. Binigyang-daan ng rehimen ang ibayong pagpapalaki, pag-aarmas at pamamayagpag ng pribadong hukbo ng angkan ito para magamit na instrumento ng karahasan kapwa sa mga kalaban nila sa reaksyunaryong pulitika at sa mga rebolusyunaryong pwersa at mamamayan.

Nagulantang ang publiko sa malagim na kinahantungan ng sistematiko at walang rendang paglalarga ni Gloria Arroyo sa warlordismo ng kanyang mga alyado. Umami ng matindi at malawakang pagkundena mula sa iba't ibang sektor ng mamamayan sa buong bansa at daigdig ang karima-rimarim na masaker. Ang masaker ay isinagawa ng angkan Ampatuan, kanilang pribadong hukbo at mga kasabwat na pwersang militar, paramilitar at pulisya ng guberno noong Nobyembre 23. Ito ay para lamang mapigilan ang pagrehistro ng kandidatura ng isang malakas na karibal mula sa pamilyang Mangudadatu, isa ring angkan *warlord*.

Umaabot na sa 57 ang natagpuang bangkay sa pinangyarihan ng masaker. Kabilang sa mga biktima ang mga myembro ng ang-



Mga tampok sa isyung ito...

Mga *warlord*, inaruga
ng rehimen PAHINA 3

Panibagong pihit sa
laro ni Arroyo PAHINA 6

10 armas, nasamsam
ng BHB PAHINA 10

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com